

ČUÁKÁNKIÄSU

Pärniäššiváldálie muštálus ovdáskoodán 2022

Pärniäššiváldálie pargon lii visásmittiđ, ete pärni vuoigádvuođah já sajattâh váldojeh vuotân lahâasâtmist já ohtsâškodálie meerridmist. Ohtii neelji ivveest pärniäššiváldáláš addel ovdáskoodán muštálus haldáttâhsyergistis. Vuossâmuu keerdi ovdásdeijeemuštálus almostui ive 2018.

Taan ovdáskoddemuštálus ulmen lii adeliđ ovdáskoodán kejâstuv paarnij sajattuvvâst já sii vuoigádvuođái olášuumist Suomâst iivij 2018–2021. Muštálus ulmen lii tuárjuđ ovdáskode váldiđ vuotân pärni vuoigádvuođaid meerridmist, ete tot puávtáččij ovdediđ šiev já pärnivuoigádvuođaid vuáduvvee pärni-, nuorâi- já perâpolitiik.

Ovdáskoddemuštálusâst láá kuttâ lovo, main vuossâmuust kuvvip iivij 2018–2021 pärnipolitiik sehe toos vaigutteijeid almonijd já ohtsâškoddepooliitlijd uđâsmitmijd. Nube lovvoost suogârdállâp syemmiláš škovlimpolitiik, ton uđâsmitmijd, tiätuvuáđu já resursijd. Kuálmád lovvoost vuáijup tarkkumpaajeest šoddâm eromâškoččâmâšâid, já niäljád lovvoost keččâp paarnijd kyeskee aalmugláš lahâasâtem ovdánmân paarnij vuoigádvuođái sopâmuš uáinust. Viidâd lovvoost mainâstep paarnij já nuorâi kuáhtámijd já sirdep sist finnejum

tiáđu. Muštálus nohá epiligin, mast tuávudep já árvuštállâp tarkkumpaajeest rahtum aalmugláš pärnistrategia.

Ovdáskoddemuštálus čáittá, ete tarkkumpaajeest pärni vuoigádvuođaid lii hástám koronapandemia, šonjâdâhnuvástume já šoddâm kiäppánem lágáneh almoneh. Ohtsâškodeest láá olášuttâm já olášutmin maangâid vijdes uđâsmitmijd, moi ohtâvuodâst pärni vuoigádvuođah láá valdum vuotân maht kuás-uv. Pärni hiáđu vuotân váldim lii ovdánâm kuuloid já váátá muštottem ubâ ääigi. Siämmâst pärnih já nuorah jieijah halideh uásálistiđ já vaiguttiđ jieijâs elimân já meiddei ohtsâškodálie meerridmân.

Muštálusâst láá kulmâ iävtuttâs. Vuossâmuštáá pärniäššiváldáláš uáiná, ete pärni hiáđu vuosâsajasâšvuodâ kalga puátteevuodâst siskálmittiđ vuáduvvee (731/1999) vuáduvuoigádvuotâravvuid. Nubben pärniäššiváldáláš pááhud, ete Suomâst kalga algáttiđ pärnisuojâlemlaavâ olesuđâsmittem. Kuálmádin pärniäššiváldáláš iävtut, ete Suomâ škovlimpolitiik resursijd kalga puátteevuodâst turviđ haldáttâspoojij paijeel čonâdâtmáin eres Taveenâmiij ruttâdmân västideijee já čielgâsávt miäruštállum ruttâdemtáásán.